

07/02/1998

Ekonomi terus pulih, pelabur asing kembali

EKONOMI Malaysia pulih lebih cepat daripada jangkaan dengan pelabur asing yang meninggalkan pasaran saham kerana panik semasa krisis mata wang memuncak, kini kembali semula dalam kumpulan besar, kata penganalisis.

"Pengurus-pengurus dana yang meninggalkan Bursa Saham Kuala Lumpur (BSKL) kini kembali semula dengan sentimen keseluruhan pasaran mencatatkan pencapaian terbaiknya sejak krisis itu bermula Julai lalu," kata seorang penganalisis kanan di Kuala Lumpur.

Dibantu oleh perkembangan positif di senario ekonomi serantau, ringgit yang jatuh pada paras bawah RM4 berbanding dolar Amerika awal bulan lalu, kini pulih sedikit melepasi paras 'psikologi' itu sejak beberapa hari lalu.

Ringgit pulih ke paras 3.8500 dalam urusan niaga pada sebelah pagi ini, iaitu aras yang mengikut penganalisa lain boleh membawa kepada pengukuhan seterusnya bagi ringgit kerana dana asing kini kembali semula ke BSKL menyebabkan permintaan tinggi bagi ringgit.

"Wang asing yang datang ke pasaran Malaysia perlu ditukar kepada ringgit sebelum boleh diperdagangkan dan ini meningkatkan permintaan bagi mata wang tempatan itu yang seterusnya menyebabkan nilainya meningkat," kata penganalisis itu.

Pemandangan di galeri firma broker saham, yang sebelum ini lengang selepas pasaran saham terjejas, jelas menunjukkan keyakinan terhadap ekonomi negara sudah kembali dan banyak saham yang harganya jatuh di paras 50 sen, kini terus naik.

Tinjauan di beberapa firma broker saham hari ini menunjukkan ada antara galeri awam kini bertukar menjadi 'pasar ikan' sehinggakan tiada tempat untuk berdiri, berbanding sebelum ini yang mana keadaannya lengang dan pelabur tidak kelihatan.

Seorang remisier berkata, jumlah saham yang didagangkan sejak beberapa hari lalu lebih mirip kepada keadaan semasa bull run pada 1993 yang mana lebih daripada satu bilion saham didagangkan.

Apabila BSKL dibuka hari ini, jumlah saham yang didagangkan melepasi angka setengah bilion pada sesi pertama.

"Malaysia kini sudah keluar daripada kemelut. Keadaan tidak menentu sejak beberapa bulan lalu kini tiada lagi dan pengurus dana asing kini sudah pun kembali," kata penganalisis kanan itu.

Sentimen pro-ringgit sejak BSKL kembali beroperasi Selasa lalu selepas cuti Tahun Baru Cina, Aidilfitri dan Hari Wilayah Persekutuan, menunjukkan prestasi membanggakan berikutan khabar Sultan Brunei sudah membeli sebuah bangunan di sini yang menjadi mercu tanda Kuala Lumpur.

Selasa lalu, BSKL memasuki Tahun Harimau dengan mencatatkan peningkatan Indeks Komposit yang terbaik sejak sekian lama.

Indeks komposit yang berlegar di sekitar 500-mata untuk beberapa bulan, naik 131.8 mata pada hari yang sama, sementara ringgit turun daripada paras empat ringgit berbanding dolar Amerika kepada 3.9800.

Menurut seorang peniaga mata wang, khabar mengenai pelaburan Sultan Brunei itu muncul dua bulan lalu tetapi kali ini 'nampaknya ada sedikit kebenaran kerana hampir keseluruhan pasaran berdesas-desus dengan khabar itu.

"Urus niaga dalam dolar Amerika itu bermakna sejumlah besar dolar akan masuk ke negara ini dan ringgit dijangka meningkat kerana kemasukan dolar Amerika itu," katanya.

Jika dapat disahkan, urus niaga membabitkan pemerintah Brunei itu yang juga orang terkaya di dunia, sudah pasti ia akan membantu ekonomi Malaysia dalam jangka panjang.

Lawatan pegawai kanan Tabung Kewangan Antarabangsa (IMF) dan Bank Dunia, serta Setiausaha Pertahanan Amerika William Cohen yang juga anggota kanan kongres baru-baru ini menyumbangkan kepada pemulihan pasaran kewangan dan saham.

Lawatan itu bertujuan membina keyakinan memandangkan keadaan ekonomi tidak menentu dengan Pengarah Urusan IMF, Michel Camdessus dan Presiden Bank Dunia James Wolfensohn menyatakan sokongan mereka terhadap langkah yang diambil oleh Malaysia dalam menangani kegawatan ekonominya.

Pegawai Amerika dan ahli perniagaan menurut duta Amerika di Kuala Lumpur, John Malott yakin yang Malaysia akan menjadi negara pertama untuk pulih daripada krisis yang menimpa Asia Tenggara dan ia mampu mengembalikan keyakinan pelabur kerana "ekonominya diuruskan lebih baik berbanding negara lain".

Penganalisis juga berkata, kepulangan pelabur asing dalam pasaran saham juga berpunca daripada ucapan negara Presiden Clinton minggu lalu yang mana beliau menyeru pelabur Amerika membantu Asia mengatasi krisis kewangan ataupun menghadapi risiko krisis itu merebak ke Amerika.

Minggu ini, jutawan kelahiran Mesir, Mohamad Al Fayed, pemilik gedung membeli belah terkemuka Harrods di London datang ke negara ini dan mengumumkan beberapa pelan untuk membantu memulihkan keyakinan pada ekonomi Malaysia.

Perdana Menteri Datuk Seri Dr Mahathir Mohamad, yang mengadakan perbincangan dengan Presiden Suharto bulan lalu, kini dalam rangka lawatan singkat ke Thailand dan Filipina untuk mendapatkan sokongan bagi penggunaan mata wang masing-masing dalam perdagangan di kalangan negara Asean.

Ini bagi mengurangkan kos urus niaga memandangkan nilai dolar Amerika sudah meningkat.

Pengarah Eksekutif Institut Penyelidikan Ekonomi (MIER) Dr Mohamed Arif berkata: "Lawatan Perdana Menteri membawa mesej yang ini adalah usaha bersama negara anggota Asean ke arah memperbaiki keadaan ekonomi di rantau."

"Apa yang membimbangkan pemimpin Asia ialah kesan daripada kemelut sekarang ini akan menyebabkan pelarasan yang menyakitkan seperti pengurangan perbelanjaan dan pemberhentian pekerja. Pemimpin Asean cuba membina keyakinan di peringkat kebangsaan dan serantau," katanya.

(END)